



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka ("Službeni glasnik BiH" broj 95/12), člana 25. Pravilnika o godišnjim finansijskim izvještajima političkih stranaka ("Službeni glasnik BiH" broj 96/13), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka ("Službeni glasnik BiH", broj: 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2012. GODINU I POSTIZBORNOG FINANSIJSKOG IZVJEŠTAJA – LOKALNI IZBORI 2012. **HRVATSKE DEMOKRATSKE ZAJEDNICE 1990**

Broj: 03-07-6-707/13
Sarajevo, 21.jul 2014. godine

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
Predmet revizije.....	5
Cilj revizije.....	5
Obim revizije.....	5
4. PRETHODNE KONTROLE I REVIZIJE	5
5. NALAZI I PREPORUKE	6
5.1. NALAZI.....	6
5.2. PREPORUKE.....	9

MIŠLJENJE REVIZORA

Služba za reviziju finansiranja političkih stranaka (u daljem tekstu: Služba za reviziju) je izvršila reviziju finansijskih izvještaja Hrvatske demokratske zajednice 1990 za 2012. godinu i to: godišnjeg finansijskog izvještaja za 2012. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka ("Službeni glasnik BiH" broj: 22/00, 102/09 i 54/10), koji je bio na snazi do 04.12.2012. godine, Zakona o finansiranju političkih stranaka ("Službeni glasnik BiH" broj: 95/12), koji je na snazi od 05.12.2012. godine i odredbama člana 15.10 Izbornog zakona BiH, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom smo utvrdili da Hrvatska demokratska zajednica 1990 u izvještajnom periodu nije postupila u skladu sa odredbama člana 4. stav (2) i člana 11. stav (1) i (3) Zakona o finansiranju političkih stranaka, koji je bio na snazi do 04.12.2012. godine.

Prema našem mišljenju, osim navedenog, revidirani finansijski izvještaj ukazuje da je Hrvatska demokratska zajednica 1990 u 2012. godini postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila reviziju godišnjeg finansijskog izvještaja Hrvatske demokratske zajednice 1990 za 2012. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

U godišnjem finansijskom izvještaju za 2012. godinu Hrvatska demokratska zajednica 1990 je iskazala prihod u iznosu od 654.691,85 KM¹, što je iskazano u narednoj tabeli:

Red.br.	Vrsta prihoda	Iznos u KM	Učešće u ukupnom prihodu %
1	Članarina	4.145,00	0,63%
2	Prilozi fizičkih lica	21.047,54	3,21%
3	Prilozi pravnih lica	9.100,00	1,39%
4	Prihodi od imovine	149,74	0,02%
5	Prihodi od pr.lica	12.524,06	1,91%
6	Prihodi od poklona	15.840,00	2,42%
7	Prihodi iz budžeta	591.885,51	90,42%
8	Ostali prihodi	0,00	0,00%
	Ukupni prihodi:	654.691,85	100,00%

Prema podacima iz godišnjeg finansijskog izvještaja, Hrvatska demokratska zajednica 1990 je ostvarila rashode u iznosu od 679.248,70 KM.²

2. PREDSTAVLJANJE POLITIČKE STRANKE

Naziv političke stranke je Hrvatska demokratska zajednica 1990. Skraćeni nazivi stranke su HDZ 1990 i HDZ' 90.

Politička stranka je u sudski registar Kantonalnog suda u Mostaru, upisana 13.04.2006. godine, pod brojem: 007-0-R-06-000031.

Sjedište političke stranke je u Mostaru, ul. Nikole Šubića Zrinskog 11/II.

Lice ovlašteno za zastupanje stranke je Božo Ljubić, predsjednik stranke.

Lice ovlašteno za podnošenje finansijskih izvještaja za 2012. godinu je Ivica Drmač.

Prema podacima iz godišnjeg finansijskog izvještaja za 2012. godinu, organizacionu strukturu Hrvatske demokratske zajednice 1990 čine:

- Središnji odbor HDZ 1990 Mostar,
- 6 kantonalnih/županijskih odbora,

¹ Podaci iz izmjenjenih obrazaca prihoda godišnjeg finansijskog izvještaja za 2012. godinu.

² Podaci iz izmjenjenih obrazaca troškova i ukupnih rashoda GFI za 2012. godinu.

- Organizacioni dio HDZ 1990 u Brčko distriktu BiH,
- 2 gradska odbora i
- 32 općinska odbora.

3. OPIS REVIZIJE

Predmet revizije je godišnji finansijski izvještaj Hrvatske demokratske zajednice 1990 za 2012. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine i to sljedećih organizacionih dijelova političke stranke:

- Središnji ured HDZ 1990,
- Općinski odbor HDZ 1990 Čitluk,
- Općinski odbor HDZ 1990 Brčko Distrikt i
- Županijski odbor HŽ HDZ 1990 Posušje.

Cilj revizije je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Hrvatska demokratska zajednica 1990 u izvještajnom periodu postupala u skladu sa odredbama Zakona o finansiranju političkih stranaka ("Službeni glasnik BiH" broj: 22/00, 102/09 i 54/10), koji je bio na snazi do 04.12.2012. godine, Zakona o finansiranju političkih stranaka ("Službeni glasnik BiH" broj: 95/12), koji je na snazi od 05.12.2012. godine i članom 15.10 Izbornog zakona BiH.

Obim revizije finansijskih izvještaja Hrvatske demokratske zajednice 1990 obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta, priloge fizičkih lica i troškove izborne kampanje.

4. PRETHODNE KONTROLE I REVIZIJE

Služba za reviziju finansiranja političkih stranaka obavila je reviziju i pregled finansijskih izvještaja Hrvatske demokratske zajednice 1990 u periodu od 2006. do 2011. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama stranci.

Nakon izvršenog pregleda godišnjeg finansijskog izvještaja za 2011. godinu, Služba za reviziju je izdala Izvještaj o pregledu godišnjeg finansijskog izvještaja Hrvatske demokratske zajednice 1990 sa mišljenjem revizora, nalazima revizije i preporukama stranci da u skladu sa odredbama Zakona o finansiranju političkih stranaka uspostavi potpune evidencije o svojim prihodima i rashodima.

Nerealizovane preporuke:

Na osnovu uočenih nedostataka u godišnjem finansijskom izvještaju za 2012. godinu, utvrđeno je da Hrvatska demokratska zajednica 1990 nije ispoštovala ranije date preporuke revizije.

5. NALAZI I PREPORUKE

5.1. NALAZI

- a) **Hrvatska demokratska zajednica 1990 je prekršila odredbe člana 4. stav (2) Zakona o finansiranju političkih stranka, koji je bio na snazi do 04.12.2012. godine.**³

Revizijom je utvrđeno da je Organizacioni dio HDZ 1990 Brčko Distrikt putem blagajne izvršio isplatu novčanih sredstava fizičkom licu za podloške za plakate u ukupnom iznosu od 2.760,00 KM. Obzirom da se radi o materijalu stranka je morala imati račun za ovu isplatu.

Takođe je utvrđeno da je isti odbor stranke izvršio isplatu sredstava putem blagajne pravnom licu Grafam za letke i plakate u ukupnom iznosu od 2.200,00 KM. Navedene isplate stranka je izvršila bez računa.

Obzirom da organizacioni dio Brčko Distrikt u dokumentaciji ne posjeduje račune, a izvršio je isplate sredstava putem blagajne, prekršio je odredbe člana 4. stav (2) Zakona o finansiranju političkih stranka, koji je bio na snazi do 04.12.2012. godine.

- b) **Politička stranka je prekršila odredbe člana 11. stav (1) i (3) Zakona o finansiranju političkih stranaka koji je bio na snazi do 04.12.2012. godine.**⁴

- (1) Revizijom je utvrđeno da je Hrvatska demokratska zajednica 1990 u svojim poslovnim knjigama evidentirala prihode u većem iznosu od ostvarenih a rashode i obaveze u manjem iznosu, i da obrasce godišnjeg finansijskog izvještaja nije popunila u skladu sa Pravilnikom o godišnjim finansijskim izvještajima političkih stranaka („Službeni glasnik BiH” broj 61/06)- u daljem tekstu: Pravilnik.

Takođe je utvrđeno da stranka nije u skladu sa poreskim propisima, obračunala i platila porez na dohodak i pripadajuće doprinose na sredstva isplaćena fizičkim licima, niti je troškove i obaveze po osnovu poreza i doprinosa evidentirala u poslovnim knjigama i godišnjem finansijskom izvještaju stranke, čime su prekršene odredbe člana 11. stav (1) i stav (3) Zakona o finansiranju političkih stranaka, koji je bio na snazi do 04.12.2012. godine.

- Kantonalni odbor HDZ 1990 Posušje i Općinski odbor HDZ 1990 Čitluk ne vode poslovne knjige u skladu sa Zakonom o računovodstvu i reviziji Federacije BiH.
- Odbor Hrvatske demokratske zajednice 1990 Brčko Distrikt je u okviru režijsko administrativnih troškova u obrascu 4-1 finansijskog izvještaja iskazao i naknade za troškove prevoza volontera u iznosu od 3.000,00 KM, koje je u poslovnim knjigama evidentirao na osnovu računa za gorivo.

Uvidom u dokumentaciju utvrđeno je da je stranka sklopila sporazum o volontiranju sa licima kojima je isplaćivala naknadu za prevoz, te nije isplaćivala naknade za volontiranje.

Obzirom da, prema stavu Ministarstva pravde FBiH, u skladu sa Zakonom o volontiranju političke stranke ne mogu biti organizatori volontiranja, stoga isplate fizičkim licima imaju

³ Član 4. Stav (2) Pravno ili fizičko lice koje političkoj stranci pruža uslugu ili proda proizvod mora stranci da ispostavi račun, bez obzira na to ko snosi plaćanje usluge ili proizvoda, odnosno, bez obzira na to da li je usluga pružena ili proizvod dat bez naplate.

⁴ U skladu sa odredbom člana 11. stav (1) Zakona o finansiranju političkih stranaka, koji je bio na snazi do 04.12.2012. godine, stranka je obavezna voditi evidencije o svojim prihodima i rashodima. U skladu sa odredbom člana 11. stav (3) Zakona o finansiranju političkih stranaka, koji je bio na snazi do 04.12.2012. godine, stranka je obavezna podnositi finansijski izvještaj u formi koju odobri Centralna izborna komisija Bosne i Hercegovine. Sadržaj, forma, način i drugi detalji izvještavanja u 2012. godini uređeni su tada važećim Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06).

karakter ličnih primanja na koje je stranka imala obavezu da obračuna i plati pripadajuće poreze i doprinose i iste evidentira u svojim poslovnim knjigama.

Takođe, je utvrđeno da su navedene isplate direktno vezane za kampanju te je stranka troškove u iznosu od 3.000,00 KM trebala iskazati u okviru troškova kampanje u obrascu 4-2. Iskazivanjem troškova propagande u obrascu 4-1 stranka je prekršila odredbe člana 20. i 22. Pravilnika.

- Stranka, odnosno Organizacioni dio HDZ 1990 Brčko Distrikt, je izvršio isplatu naknade fizičkim licima za izradu Web sajta u iznosu od 80,00 KM i isplate goriva za podjelu plakata u iznosu od 650,00 KM, te je isplatila donaciju fizičkom licu u iznosu od 500,00 KM. Obzirom da navedeni odbor stranke nema zaposlena lica, navedene isplate imaju karakter ličnih primanja, na koje je stranka imala obavezu da obračuna i plati pripadajuće poreze i doprinose i iste evidentira u svojim poslovnim knjigama.
- (2) Stranka je u godišnjem finansijskom izvještaju iskazala ostale prihode u iznosu od 12.519,07 KM.
- Uvidom u dokumentaciju utvrđeno je da stranka nije blagovremeno evidentirala prihode iz budžeta Općine Ravno, te da je pogrešno evidentirala troškove u ranijem periodu, što za rezultat ima priznavanje prihoda iz ranijih godina u tekućoj godini.
- Naime, stranka je uplatu budžetskih sredstava Općine Ravno iz 2010. Godine evidentirala u poslovnim knjigama za 2012. Godinu. Takođe, stranka je izvršila ispravku knjiženja po računu pravnog lica Medija Res koje je u poslovnim knjigama za 2008. godinu dva puta evidentirala, kao i izvršila usaglašavanja početnih stanja na izvodima nekih od općinskih odbora stranke.
- (3) Uvidom u dokumentaciju utvrđeno je da Organizacioni dio HDZ 1990 Brčko Distrikta koristi poslovni prostor bez naknade čija bi vrijednost da plaća na godišnjem nivou iznosila 1.440,00 KM, što je stranka i iskazala u finansijskom izvještaju kao nenovčanu donaciju u obrascu 3-e.
- Stranka u svojim poslovnim knjigama nije evidentirala nenovčanu donaciju i troškove zakupa za Odbor HDZ 1990 Brčko Distrikta u iznosu od 1.440,00 KM, a iste je iskazala u obrascu 4-1.
- Uvidom u blagajnu utvrđeno je da Odbor HDZ 1990 Brčko Distrikt vršio isplate na osnovu neadekvatne dokumentacije. Stranka je izvršila isplatu troškova fizičkom licu za najam zemljišta na kojem je postavljen bilbord u iznosu od 195,00 KM, a pri tome nema sklopljen ugovor o najmu navedenog zemljišta. Takođe, isti organizacioni dio stranke je izvršio isplatu novčanih sredstava po osnovu računa pravnog lica Mendeš u iznosu od 3.891,45 KM, a isti pri tome ne glasi na stranku.
 - U obrascima 3 (ukupni prihodi stranke) i 3-f (Prihodi iz budžeta) finansijskog izvještaja stranka nije iskazala prihod iz budžeta Općine Kupres u iznosu od 1.011,02 KM, čime je prekršila odredbe člana 13. i člana 19. Pravilnika.
- (4) Stranka je u obrascu 4 (Ukupni rashodi) i 4-1 (Režijsko-administrativni i ostali troškovi) finansijskog izvještaja iskazala troškove u manjem iznosu za 9.303,00 KM, što ukazuje na činjenicu da stranka u trenutku plaćanja evidentira troškove. Neiskazivanjem troškova stranka je prekršila odredbe člana 20. i člana 21. Pravilnika.
- Stranka nije iskazala troškove zakupa za Općinski odbor HDZ 1990 Čapljina u iznosu od 2.640,00 KM.

Prema Ugovoru o zakupu poslovnog prostora sa Sarajevo osiguranjem Podružnica Čapljina stranka je dužna plaćati mjesečni zakup za poslovni prostor u iznosu od 220,00 KM, što za 12 mjeseci iznosi 2.640,00 KM, bez PDV-a.

- Stranka nije iskazala troškove zakupa za Općinski odbor HDZ 1990 Grude u iznosu od 360,00 KM.
Prema Ugovoru o zakupu sa Općinom Grude stranka je dužna ovoj općini plaćati mjesečni zakup u iznosu od 30,00 KM, što za 12 mjeseci iznosi 360,00 KM, bez PDV-a.
 - Uvidom u Ugovor o zakupu poslovnog prostora sa fizičkim licem utvrđeno je da je stranka, odnosno Općinski odbor HDZ 1990 Neum, bio dužan plaćati mjesečni zakup za poslovni prostor u iznosu od 300,00 KM, što za 12 mjeseci sa PDV-om iznosi 3.600,00 KM.
Stranka nije iskazala troškove zakupa poslovnog prostora za Općinski odbor Neum u iznosu od 3.600,00 KM.
 - Prema Ugovoru o zakupu poslovnog prostora sa fizičkim licem utvrđeno je da je cijena mjesečnog zakupa poslovnog prostora za Općinski odbor Hrvatske demokratske zajednice 1990 Stolac iznosila 400,00 KM, što za 12 mjeseci iznosi 4.800,00 KM.
Stranka je iskazala troškove zakupa poslovnog prostora za Općinski odbor HDZ 1990 Stolac u iznosu od 3.300,00 KM, odnosno manje troškove za 1.500,00 KM.
 - Stranka je iskazala troškove zakupa za Općinski odbor Hrvatske demokratske zajednice 1990 Zenica u iznosu od 617,00 KM, odnosno manje troškove za 313,00 KM.
Prema Ugovoru o zakupu sa HKD „Napredak“ cijena mjesečnog zakupa je 155,00 KM, s tim da ova stranka plaća 50% od ove cijene, što za 12 mjeseci iznosi 930,00 KM.
 - Stranka je iskazala troškove zakupa za Općinski odbor HDZ 1990 Novi Travnik u iznosu od 1.360,00 KM, odnosno manje troškove za 440,00 KM.
Prema Ugovoru o zakupu sa fizičkim licem cijena mjesečnog zakupa je 150,00 KM, što za 12 mjeseci iznosi 1.800,00 KM.
 - Stranka je iskazala troškove zakupa za Općinski odbor HDZ 1990 Kreševo u iznosu od 750,00 KM, odnosno manje troškove za 450,00 KM.
Prema Ugovoru o zakupu sa fizičkim licem cijena mjesečnog zakupa je 100,00 KM, što za 12 mjeseci iznosi 1.200,00 KM.
 - Pored navedenog revizijom je utvrđeno da su neki od općinskih odbora stranke iskazali troškove zakupa u većem iznosu od ostvarenog i to: Središnji odbor HDZ 1990 Mostar u iznosu od 10.800,00 KM, Općinski odbor HDZ 1990 Prozor-Rama u iznosu od 1.977,54 KM, Općinski odbor HDZ 1990 Odžaku iznosu od 1.100,00 KM, Općinski odbor HDZ 1990 Busovača u iznosu od 300,00 KM i Općinski odbor HDZ 1990 Uskoplje u iznosu od 850,00 KM.
- (5) U obrascu 5 (pozajmice, krediti i dugovanja) finansijskog izvještaja stranka je iskazala obaveze prema dobavljačima u iznosu od 164.527,17 KM.
Revizijom je, a na osnovu Izvoda otvorenih stavki, utvrđeno da Hrvatska demokratska zajednica 1990 nije u poslovnim knjigama uspostavila potpune i tačne evidencije o obavezama prema dobavljačima i nije iskazala svoje obaveze ispravno u godišnjem finansijskom izvještaju, čime je prekršila odredbe člana 23. Pravilnika.
- Stranka je u finansijskom izvještaju i poslovnim knjigama iskazala obavezu prema dobavljaču “Marić” Žepče u iznosu od 2.500,00 KM.

Prema podacima koje je dostavio "Marić" Žepče stranka nema obaveza prema ovom pravnom licu.

- Uvidom u dokumentaciju stranke utvrđeno je da je stranka do 31.12.2012. godine izmirila obaveze prema dobavljaču Globus Mil.
Prema Izvodu otvorenih stavki koji je dostavio navedeni dobavljač obaveze stranke na dan 31.12.2012. godine iznose 151,66 KM.
- Stranka je u finansijskom izvještaju i poslovnim knjigama iskazala obavezu prema dobavljaču "HT Eronet" Mostar u iznosu od 3.399,87 KM.
Prema podacima koje je dostavio „HT Eronet“ obaveze stranke prema ovom pravnom licu iznose 470,41 KM, što je za 2.929,46 KM manje u odnosu na obaveze koje je HDZ 1990 iskazala u obrascu 5.

Troškovi izborne kampanje

Hrvatska demokratska zajednica 1990 je iskazala troškove izborne kampanje u skladu sa odredbama člana 15.10 Izbornog zakona Bosne i Hercegovine, odnosno u okviru zakonom utvrđenog limita.

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM⁵ po biraču u svakom izbornom krugu, prema broju birača koje je objavila Centralna izborna komisija BiH.

U svrhu izborne kampanje Hrvatska demokratska zajednica 1990 je iskazala troškove u iznosu od 170.761,28 KM, dok je prema podacima Centralne izborne komisije BiH, na osnovu broja birača, mogla potrošiti 290.397,05 KM.

5.2. PREPORUKE

Preporučuje se Hrvatskoj demokratskoj zajednici 1990 da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da ne vrši isplate bez računa,*
- *da vodi evidencije o svojim prihodima i rashodima i da finansijske izvještaje podnosi u formi koju je odobrila Centralna izborna komisija BiH i*
- *da poštuje i druge propise, prevashodno poreske, iz kojih proističu dodatne obaveze i troškovi, koje politička stranka treba izmirivati i evidentirati u poslovnim knjigama i finansijskom izvještaju koji podnosi Centralnoj izbornoj komisiji BiH.*

Takođe, se preporučuje:

- *da prihode i rashode priznaje u momentu njihovog nastanka, a ne u trenutku naplate ili plaćanja,*
- *da uspostavi internu kontrolu i sistem nadzora nad poslovanjem nižih organizacionim dijelova stranke,*

⁵ Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

- *da račune koje isplaćuje putem blagajne ovjerava potpisom ovlaštene osobe, kako bi uspostavila kontrolu nad trošenjem sredstava, te da ne vrši isplate na osnovu nevalidnih dokumenata,*
- *da niži organizacioni dijelovi stranke svoje poslovanje, odnosno plaćanja, vrše putem transakcijskog računa, te plaćanja putem blagajne svedu na minimum i*
- *da izvrši usaglašavanje obaveza i provede odgovarajuća knjiženja u svojim poslovnim knjigama.*

KOMENTAR:

Hrvatska demokratska zajednica 1990 nije se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2012. godinu koji je stranci dostavljen 04.07.2014. godine.

Zahvaljujemo se ovlaštenoj osobi za finansijske izvještaje i osoblju Centralnog odbora Hrvatske demokratske zajednice 1990 na dobroj i korektnoj saradnji tokom obavljanja revizije finansijskih izvještaja.

Šef odsjeka za revizijske poslove

Sanja Tošović

Revizor

Veliborka Kenjić

Pomoćnik revizora

Anela Burdžović-Kapić

Šef Službe za reviziju

mr.sc. Hasida Gušić